

0.0.1 paṭhama ariyasāvakasuttaṃ

0. sāvatthiyaṃ-

1. na bhikkhave sutavato ariyasāvakassa evaṃ hoti: "kinnu kho kismiṃ sati kiṃ hoti, kissuppādā kiṃ uppajjati kismiṃ sati nāmarūpaṃ hoti, kismiṃ sati saḷāyatanaṃ hoti, kismiṃ sati phasso hoti, kismiṃ sati vedanā hoti, kismiṃ sati taṇhā hoti, kismiṃ sati upādānaṃ hoti, kismiṃ sati bhavo hoti, kismiṃ sati jāti hoti, kismiṃ sati jarāmaraṇaṃ hoti"ti,

2. atha kho bhikkhave sutavato ariyasāvakassa aparappaccayā ñāṇame vettha hoti: "imasmimṃ sati idaṃ hoti. imassuppādā idaṃ uppajjati. viññāṇe sati nāmarūpaṃ hoti. nāmarūpe sati saḷāyatanaṃ hoti. saḷāyatane sati phasso hoti. phasse sati vedanā hoti. vedanāya sati taṇhā hoti. taṇhāya sati upādānaṃ hoti. upādāne sati bhavo hoti. bhavo sati jāti hoti. jātiyā sati jarāmaraṇaṃ hoti"ti so evaṃ pajānāti: "evaṃ ayaṃ loko samudayatī"ti.

3. na bhikkhave, sutavato ariyasāvakassa evaṃ hoti: "kiṃ nu kho kismiṃ asati kiṃ na hoti, kissa nirodhā kiṃ nirujjhati, kismiṃ asati nāmarūpaṃ na hoti, kismiṃ asati saḷāyatanaṃ na hoti, kismiṃ asati phasso na hoti, kismiṃ asati vedanā na hoti, kismiṃ asati taṇhā na hoti, kismiṃ asati upādānaṃ na hoti, kismiṃ

asati bhavo na hoti, kismiṃ asati jāti na hoti, kismiṃ asati jarāmaṇaṃ na hotī"ti.

4. atha kho bhikkhave, sutavato ariyasāvakassa aparappaccayā ñāṇamevettha hoti: "imasmiṃ asati idaṃ na hoti. imassa nirodhā idaṃ nirujjhati. viññāṇe asati nāmarūpaṃ na hoti. nāmarūpe asati saḷāyatanaṃ na hoti. saḷāyatane asati phasso na hoti. phasse asati vedanā na hoti. vedanāya asati taṇhā na hoti. taṇhāya asati upādānaṃ na hoti. upādāne asati bhavo na hoti. bhavo asati jāti na hoti. jātiyā asati jarāmaṇaṃ na hotī"ti. so evaṃ pajānāti "evaṃ ayaṃ loko nirujjhati"ti.

5. yato kho bhikkhave, ariyasāvako evaṃ lokassa samudayaṃ ca atthaṅgamaṃ ca yathābhūtaṃ pajānāti. ayaṃ vuccati bhikkhave, ariyasāvako diṭṭhisampanno itipi, dassanasampanno itipi, āgato imaṃ saddhammaṃ itipi, passati imaṃ saddhammaṃ itipi, sekhena ñāṇena samannāgato itipi, sekhāya vijjāya samannāgato itipi, dhammasotaṃ samāpanno itipi, ariyo nibbedhikapaṇṇo itipi, amatadvāraṃ āhacca tiṭṭhati itipī"ti.